

**PERTANYAAN LISAN DEWAN RAKYAT**

**PERTANYAAN : LISAN**

**DARIPADA : Y.B. DR TAN SENG GIAW (KEPONG)**

**TARIKH : 10 JUN 2014**

**SOALAN : Y.B. DR TAN SENG GIAW** minta**PERDANA MENTERI** menyatakan dasar dan langkah untuk memastikan kewujudan kesederhanaan dan penghormatan kepada agama masing-masing di dalam masyarakat majmuk ini.

**JAWAPAN :**

**Yang Di Pertua,**

Seperti yang sedia maklum, di mana-mana Negara majmuk termasuk Malaysia, atas sebab perbezaan etnik, agama, budaya atau bahasa, rakyat cenderung bergaul berkelompok sendiri, dan kurang bergaul dengan kelompok-kelompok lain secara rapat. Ini menjadi punca untuk perbezaan pandangan dan persepsi mahupun polarisasi social antara kaum, komuniti atau kelompok. Di dalam setiap kaum atau komuniti, terdapat pula satu perbezaan pandangan dan pendirian kerana perbezaan status ekonomi dan social atau pengalaman dan pengaruh luar, ada di antaranya yang sempit atau konservatif dan ada pula yang terbuka atau 'liberal'.

Perbezaan pandangan dan fenomena polarisasi ini mungkin merosot apabila adanya pemimpin-pemimpin politik atau komuniti mempolitikkan isu-isu dari sudut yang sempit atau ekstrem untuk mendapat sokongan, menjadi jaguh atau mengutamakan kepentingan sendiri. Kadang-kala, perbuatan seumpama ini mencetuskan perselisihan serta sentiment perkauman atau agama yang boleh menggugat ketenteraman masyarakat pada amnya, sekiranya tidak diuruskan dan ditangani

dengan sesuai dan berhati-hati. Kejadian seumpama ini berlaku dalam banyak Negara, termasuk yang dianggap sebagai yang demokratik dan maju, seperti Negara-negara barat.

Dalam konteks Malaysia, pucuk pimpinan Negara pada amnya memang sangat sedar dan peka akan cabaran-cabaran untuk terus memupuk persefahaman, mengekalkan keharmonian, menguruskan pelbagai jurang antara kaum serta meredakan sebarang sentimen dan sengketa yang timbul. Penggubalan polisi dan strategi dalam semua bidang sentiasa berpandukan kepada Perlembagaan Persekutuan dan Rukun Negara sebagai asas kenegaraan yang mengambil kira dan merangkumi hak-hak asasi semua rakyat secara betapa seimbang yang mungkin. Walau bagaimanapun, tidak dapat dinafikan bahawa dalam pelaksanaan, kadang-kala menimbulkan masalah penyelewengan atau kecacatan yang ada di antaranya ditafsirkan sebagai tidak wajar atau melampau.

Memandangkan bahawa proses membina Negara dan memupuk perpaduan sememangnya merupakan satu perjuangan yang berterusan yang memerlukan pembaharuan dan transformasi dari masa ke semasa, maka YAB Perdana Menteri telah giat melaksanakan gagasan 1Malaysia sejak 2009 untuk terus menyemaikan nilai-nilai murni serta sikap penerimaan, saling menghormati dan keterangkuman (*inclusiveness*) di kalangan rakyat.

YAB Perdana Menteri telah mencadangkan inisiatif Gerakan Global ke Arah Kesederhanaan (*Global Movement of the Moderates*) buat pertama kalinya dalam ucapan beliau di Persidangan Agung Bangsa-bangsa Bersatu pada Oktober 2010. Intipati utama inisiatif tersebut yang berdasarkan konsep Wasatiyyah atau 'moderation' dalam Islam adalah untuk merangkumkan kerjasama di antara golongan-golongan sederhana dari pelbagai agama serta menggalakkan dialog antara para penganut semua agama bagi melahirkan masyarakat yang bersatu-padu dan saling menghormati di antara satu sama lain, kerana konsep kesederhanaan ini terdapat juga dalam falsafah agama-agama lain.

Konsep **wasatiyyah** yang bermaksud sederhana, pertengahan dan berimbang adalah sesuai sebagai pemangkin kepada Gagasan 1Malaysia untuk diamalkan di masyarakat majmuk Malaysia, kerana selaras dengan wawasan kepimpinan Negara yang mahu mewujudkan keseimbangan dalam membina perpaduan yang lebih harmoni di kalangan masyarakat pelbagai bangsa, agama dan adat resam budaya.

Untuk memantapkan lagi strategi dan pelaksanaan '**wasatiyyah**' yang sederhana dan seimbang ini, Kerajaan telah menubuhkan Institut Wasatiyyah yang akan diletakkan di bawah Jabatan Perdana Menteri, manakala Kursi Wasatiyyah diwujudkan di Universiti Malaya yang akan menjadi pemangkin kepada gerakan kesederhanaan di Malaysia.

Walaupun masih ada mereka yang mempunyai pandangan atau pendekatan yang ekstrem, Kerajaan yakin bahawa dengan langkah-langkah dan pendekatan kesederhanaan yang berterusan yang dilaksanakan, rakyat secara umumnya akan menjadi semakin matang dan akan dapat menilai dengan sendiri bahawa '**wasatiyyah**' inilah yang amat sesuai untuk masyarakat kita dan bukannya pendekatan ekstrem. Usaha memupuk persefahaman dan perpaduan dalam kepelbagaian (**unity in diversity**) sememangnya memerlukan sikap keterangkuman, penyertaan dan sumbangan semua pihak, terutamanya para pemimpin politik, pemimpin masyarakat dan penjawat awam.

**PEMBERITAHUAN PERTANYAAN  
DEWAN RAKYAT, MALAYSIA**

PERTANYAAN : LISAN

TARIKH : 10 JUN 2014 (SELASA)

DARIPADA : Y.B. DATUK WEE JECK SENG  
[ TANJONG PIAI ]

**SOALAN :-**

**Y.B. DATUK WEE JECK SENG [ TANJONG PIAI ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada Kementerian sedar bahawa ramai penyewa di PPR telah meninggal dunia namun kediaman tersebut masih dihuni oleh waris dan apakah tindakan Kementerian berkaitan dengan isu ini.

## **JAWAPAN :-**

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan melalui Jabatan Perumahan Negara (JPN) merancang dan membangunkan PPR diseluruh Malaysia. PPR (Disewa) yang telah siap dan sedia diduduki akan diserahkan kepada Kerajaan Negeri untuk diuruskan melalui SUK Perumahan/Lembaga Perumahan Negeri/Pihak Berkuasa Tempatan (PBT) yang berkenaan untuk penyewaan.

Adalah menjadi tanggungjawab SUK Perumahan / Lembaga Perumahan / PBT untuk sentiasa **mengemaskini** serta **mengaudit** penghuni-penghuni PPR dari semasa ke semasa. Sekiranya berlaku ketidak patuhan termasuk rumah didiami oleh waris penyewa yang telah meninggal dunia, SUK Perumahan/Lembaga Perumahan/PBT berhak untuk mengambil tindakan sewajarnya terhadap penghuni-penghuni seperti melucut hak sewaan.

Walau bagaimanapun, sekiranya waris yang menduduki rumah berkenaan adalah merupakan waris terdekat seperti **suami/isteri** atau **anak-anak**

yang layak menduduki rumah PPR, maka pihak SUK Perumahan/Lembaga Perumahan/PBT boleh atas budi bicaranya menyerahkan hak penyewaan rumah berkenaan kepada mereka.

Selain pemantauan dan penguatkuasaan oleh SUK Perumahan / Lembaga Perumahan / PBT, JPN juga melaksanakan pendekatan turun padang dengan menjalankan **pengauditan** dan **kajian outcome** untuk mengenal pasti **penghuni sebenar** sebagaimana objektif penyediaan PPR serta masalah yang dihadapi oleh mereka.

Kementerian Kesejahteraan Bandar,  
Perumahan dan Kerajaan Tempatan

Jun 2014